

Evening Dogri (NSD)

12-12-2025

खबरां

1. सरकारै आखेआ ऐ जे ओहू लोकसभा च हवा दे प्रदूषण सरबन्धी मुद्दे पर चर्चा लेई तयार ऐ।
2. राई-बाई मंत्री शिवराज सिंह चौहान होरें आखेआ ऐ जे पिछले 10 बरें च मुल्खे च फसल उत्पादन च 44 फीसद दा बादा होआ ऐ।
3. राष्ट्रपति द्रौपदी मुर्मू होरें मणिपुर दे सेनापति जिले च 6 विकास परियोजनाएं दा उद्घाटन कीता।
4. कांग्रेस दे वरिष्ठ नेता ते साबका केंद्री गृह मंत्री शिवराज पाटिल हुंदा काल होई गेआ। राष्ट्रपति, प्रधानमंत्री ते होरनें दुए नेताएं पाटिल हुंदा काल होई जाने पर दुख ते बसोस जाहिर कीता।
5. आंध्र प्रदेश दे अल्लूरी सीता रामा राज जिले च होए दे बस हादसे च 9 लोक मारे गए ते 22 घायल।

<><><><><><>

Govt. Air Pollution

पार्लिमानी मामलें दे मंत्री किरन रिजिजू होरें आखेआ ऐ जे सरकार लोकसभा च वायु प्रदूषण दे मुद्दे पर चर्चा आस्तै तैयार ऐ। उने आखेआ जे विपक्ष दे नेता नै कार्य सलाहकार समिति च एह मुद्दा पुट्टेआ हा, इस करी सरकार गी इस पर विचार करना होग ते एह दिखना होग जे नियमें मूजब चर्चा कियां आयोजित कीती जा। रिजिजू होरें आखेआ जे पैहले गै दिन सरकार नै अपना रुख साफ करी दिता हा जे सारे महत्वपूर्ण मुद्दे पर सरकार विपक्षी दलें दे सुझा गी ध्यान च रखदे होई हल कडुने आस्तै चर्चा लेई तैयार ऐ। शून्यकाल च इस मुद्दे गी पुट्टेदे होई विपक्ष दे नेता राहुल गांधी होरें आखेआ जे एहू इक महत्वपूर्ण मुद्दा ऐ। श्री गांधी होरें मेद जाहिर कीती जे सदन च इस मुद्दे पर चर्चा आस्तै विपक्ष ते सरकार बश्कार पूर्ण सहमति होग। उने आखेआ जे सरकार गी शहरें च वायु प्रदूषण कन्नै निबडने आस्तै कोई योजना बनानी चाईदी। उने आखेआ जे कांग्रेस सनें विपक्ष ऐसी योजना दे निर्माण च सहयोग करने आस्तै पूरी चाल्ली तैयार ऐ। कांग्रेस सने होर दुए विपक्ष दल

शीतकालीन सत्र शुरू होने था गै देशों च वायु गुणवत्ता पर चर्चा दी मंग करा'रदे न। देशों दे केंई हिस्सें च वायु प्रदूषण गी लेईऐ सांसदें दी चिंता दे मद्देनजर अध्यक्ष ओम बिरला होरें सदन च चर्चा कराने आस्तै सरकार ते विपक्ष कन्नै गल्ल कीती।

<><><><><><>

PMABJAY

आयुष्मान् भारत – जन आरोग्ये योजना दे तैहत इक हजार 184 अस्पतालें गी धोखाधड़ी गतिविधियें आस्तै सूची सोयां हटा दिता गया ऐ। लोकसभा च लिखित परते च सेहत ते परोआर कल्याण मंत्री प्रताप राव जाधव होरें आक्खेआ जे फर्जी गतिविधियें आस्तै दो सौ 31 करोड़ रूपे दा जुर्माना बी लाया गया ऐ। उने आक्खेआ जे राज्यें ते केंद्रशासित प्रदेशें आस्सेआ अज्जे तगर चार सौ 11 अस्पतालें गी निलंबित कीता गया ऐ। श्री जाधव होरें दस्सेआ जे राष्ट्रीय स्वास्थ्य प्राधिकरण च राष्ट्रीय धोखाधड़ी इकाई कायम कीती गेई ऐ जेडी राज्यें दी धोखाधड़ी रोधी इकाइयें आस्तै मिलिए कम्म करदी ऐ।

<><><><><><>

Anurag Complain

भाजपा सांसद अनुराग ठाकुर होरें ई-सिगरेट मामले च लोकसभा अध्यक्ष ओम बिरला हुन्दे था लिखित च शकैत दर्ज कीती ऐ। उने संसदीय परिसर च तृणमूल कांग्रेस सांसद आस्सेआ ई-सिगरेट पीने दा आरोप लाया ऐ। ठाकुर होरें इस घटना दी जांच ते सदस्यर खिलाफ अनुशासन संबंधी कार्रवाई शुरू करने दी मंग कीती। ठाकुर होरें लोकसभा च कल एह मुद्दा पुट्टेआ हा जेदे पर श्री बिरला होरें उनें गी लिखित च शकैत करने लेई आक्खेआ हा। बिरला होरें आक्खेआ जे संसद दे कुसै बी सदस्य गी ई-सिगरेट, धूम्रपान या इस चाल्ली गी कुसै भी प्रतिबंधित गतिविधि आस्कतै छूट या विशेषाधिकार हासल नेई ऐ।

<><><><><><>

Crop Production

सरकारै आक्खेआ ऐ जे पिच्छले दस बरें च देशों च फसल उत्पादन च 44 फीसद दा बाढ़ा होआ ऐ जेडी जे इक महत्वपूर्ण उपलब्धि ऐ। अज्ज राज्यसभा च प्रश्नकाल दौरान जिमनी सोआलें दा परता दिन्दे होई केंद्रीय कृषि ते करसाने दे कल्याण सरबन्धी मंत्री शिवराज सिंह चौहान होरें आक्खेआ जे एह बाढ़ा 2014 सोयां 2024 च बीज दी नमी किस्में, आधुनिक तकनीकें ते बेहतर कृषि पद्धतियें दे इस्तेमाल च आनने करी मुमकिन होआ ऐ। उने आक्खेआ जे सरकार कृषि क्षेत्र च व्यापक विकास यकीनी करने आस्तै लगातार जतन करा र दी ऐ।

उने आक्खेआ जे मोदी सरकार करसानें गी आमदन बढ़ाने ते समग्र कृषि विकास गी गति देने पर ध्यान केंद्रित करा र दी ऐ। कृषि उत्पादन गी बढ़ावा देने आस्तै 6 सूत्री रणनीति लागू कीती जा र दी ऐ। चौहान होरें इस गल्ला पर लौह पाई जे सरकार करसानें गी दो लक्ख करोड़ रुपे दी उर्वरक सब्सिडी प्रदान करा र दी ऐ। ते प्रधानमंत्री करसान सम्मान निधि तैहत चार लक्ख करोड़ रुपे सोयां मती दी राशि सीधे करसानें दे खातें च पाई जाई चुकी दी ऐ। उने आक्खेआ जे प्रधानमंत्री फसल बीमा योजना तैहत करसानें दे खातें च इक लक्ख 90 हजार करोड़ रुपे दा मुआवजा जमा कीता जाई चुके दा ऐ। चौहान होरें आक्खेआ जे पंजाब सरकार नै अजें तकर प्रधानमंत्री फसल बीमा योजना गी लागू नेई कीता ऐ। उने आक्खेआ जे जेकर एह योजना राज्य च लागू होई जन्दी ऐ तां पंजाब दे करसानें गी हाडें थ्वा होए दे व्यापक नुकसान सोयां होर मती सुरक्षा मिली सकदी।

<><><><><><>

Prez. Manipur

राष्ट्रपति द्रौपदी मुर्मु होरें अज्ज मणिपुर दे सेनापति जिले च 6 बक्ख बक्ख विकास परियोजनाएं दा उद्घाटन कीता। उने जिले दी 5 होर विकास परियोजनाएं दा नीहू पत्थर रक्खेआ। इने परियोजनाएं च 25 करोड़ रुपे दी लागत कन्नै विकसित इक आदर्श आवासीय विद्यालय, दस करोड़ रुपे दी लागत कन्नै दर्जा बढ़ाए गेदे दो प्राथमिक सेहत केंद्र ते 11 करोड़ रुपे दी लागत कन्नै तयार दो बेली पुल शामिल ऐ। उद्घाटन ते नीहू रक्खी गेदी परियोजना छात्रावास, जन सुरक्षा, स्वास्थ्य सेवा, सामुदायिक ते जनजातीय विकास, शिक्षा ते होर दुए क्षेत्रें कन्नै सरबन्धित न। सेनापति जिला मुख्यालय पुज्जनें मगरा राष्ट्रपति होरें राहत शिविरें च शरण लैते दे आंतरिक रूप कन्नै विस्थापित व्यक्तियें कन्ने गल्लबात कीती। उने मणिपुर दी एकमात्र जनजाति, मरम जनजाति दे नेता कन्नै बी मलाटी कीती। जेडी खास तौर पर कमजोर जनजातीय समूहें दी श्रेणी च औन्दी ऐ। मगरा सेनापति जिले दे बहुद्देशीय हॉल च आयोजित इक समारोह च राष्ट्रपति होरें परियोजना दा लोकार्पण कीता ते लीहू पत्थर रक्खेआ। इस समारोह च जिले दी पीएम जनमन पैहल दे तैहत मरम जनजाति पर इक लघु फिल्म बी दस्सी गेई।

<><><><><><>

India-Cruise

केंद्रीय मंत्री गजेन्द्र सिंह शेखावत होरें आक्खेआ जे भारत कूज पर्यटन दा नमा केंद्र बना र दा ऐ। उने आक्खेआ जे होटलें ते रेस्तेरां च टकोदा बाद्दा दिक्खेआ जा'रदा ऐ ते प्रमुख वैश्विक होटल समूह देशै च निवेश करा'रदे ना। अज्ज नमी दिल्ली च मीडिया कन्ने गल्लबात करदे होई शेखावत होरें देशै च बददे सैलसफा च वंदे भारत रेलगाडी दी भूमिका दा बी जिक्र कीता। शेखावत होरें आक्खेआ जे पिच्छले 11 बरें च सिडकें, रेलवे ते जल मार्गें दे बुनियादी ढांचे च जिस चाल्ली कन्नै बदलाव आया ऐ, इसदे क्रनै नां छडा देशै दी अर्थबवस्था च सुधार होआ ऐ सगुआं सैलसफा क्षेत्र च बी टकोदा बाद्दा होआ ऐ। शेखावत होरें रेल हादसे घट्ट करने आस्तै मुख्यद गलियारें च कवच प्रणाली ते ड्रोन निगरानी जनेई व्यतवस्थाएं दा बी जिक्र कीता।

<><><><><><>

UGC-PWUBD

संघ लोक सेवा आयोग नै विशिष्ट दिव्यांगजन- PWUBD आस्तै इम्तेहानें दी मता सखल्ला बनाने दी दिशा च इक महत्वपूर्ण दें पुट्टने दी घोषणा कीती ऐ। आयोग हुन एहू यकीनी करौग जे ऐसे हर दिव्यांगजन मेदवार गी आवेदन पत्र च दस्से गेदे उन्दी पसंद दा केंद्र मिली सकै। इस प्रक्रिया तैहत संघ लोक सेवा आयोग सब्बन थ्वा पैहले विशिष्ट दिव्यांगजन-पीडब्लक्यूबीडी ते गैर-विशिष्ट दिव्यांग मेदवारें दोन आस्तै हर इक केंद्र दी मौजूदा क्षमता दा इस्तेमाल करोग। इक बारी केंद्र दी पूरी क्षमता भरी जाने पर कोई गैर-विशिष्ट दिव्यांग आवेदक इस केंद्र दा चुनाव नेई करी सकग, पर विशिष्ट दिव्यांगजन मेदवार आस्तै एहू संभव होई सकग। अतिरिक्त क्षमता दी व्यवस्था बी कीती जाग तां जे कुसै बी विशिष्ट दिव्यांगजन आवेदक गी उन्दे पसंदीदा परीक्षा केंद्र सोयां वंचित नेई कीता जा। आयोग दे अध्यक्ष डॉ.अजय कुमार होरें आक्खेआ जे एहू फैसला पिछले 5 वरें च परीक्षा केंद्रें दे आंकड़ें दे विश्लेषण दे आधार पर लैता गेआ ऐ। जेदे च पाया गया हा जे दिल्ली, कटक, पटना ते लखनऊ जनेहू केंद्र अक्सर तौले भरी जन्दे ना। उने विश्वाास जाहिर कीती जे इस नमें तंत्र कन्नै PWUBD मेदवारें गी इम्तेहानें च शामिल होने च सौख होग।

<><><><><><>

Patil-Dies

कांग्रेस दे वरिष्ठ नेता ते साबका केंद्रीय गृह मंत्री शिवराज पाटिल हुन्दा लातूर च काल होई गया। ओहू 91 वरें दे हे। श्री पाटिल होरें अज्ज बडलै साढे छह बजे अपने आवास पर खीरी साहू लैता। अपने लम्मे राजनीतिक जीवन च श्री पाटिल होरें लोकसभा अध्यक्ष ते केंद्र सरकार च केंई महत्वपूर्ण मैहकमें सनें केंई प्रमुख ओहदे पर कम्म कीता। राष्ट्रपति द्रौपदी मुर्मु, प्रधानमंत्री नरेन्द्रप मोदी, गृह मंत्री अमित शाह, रक्षा मंत्री राजनाथ सिंह ते सेहत ते परोआर कल्याण मंत्री जगत प्रकाश नड्डा सनें केंई नेताएं साबका केंद्रीय मंत्री शिवराज पाटिल हुन्दा काल होई जाने पर दुख ते बसोस जाहिर कीता ऐ।

<><><><><><>

Prez. PM Patil

राष्ट्रपति द्रौपदी मूर्मु होरें पाटिल होरें गी चेता करदे होई आक्खेआ जे पाटिल होरें लोकसभा अध्यक्ष, केंद्रीय मंत्री, राज्यपाल ते इक सांसद सनें केंई महत्वपूर्ण ओहदे पर कम्म कीता। सोशल मीडिया दी इक पोस्ट च प्रधानमंत्री होरें आक्खेआ जे पाटिल होर इक अनुभवी नेता हे, जिने विधायक, सांसद, महाराष्ट्र विधानसभा अध्यक्ष ते लोकसभा अध्यक्ष दे तौर पर बी कम्म कीता। महाराष्ट्र दे मुख्मन्त्री देवेंद्र फडणवीस होरें श्री पाटिल होरें गी श्रद्धांजलि भेंट करदे होई उनें दी इक गरिमामय नेता दस्सेआ।

<><><><><><>

Parl Tributes

लोकसभा च बी शिवराज पाटिल होरें गी श्रद्धांजलि दिती गई। सदन दी कार्यवाई 11 बजे शुरू होने पर अधीक्ष ओम बिरला होरें श्री शिवराज पाटिल हुन्दा काल होई जाने दी जानकारी दिती। श्री बिरला होरें आक्खेआ जे शिवराज पाटिल महाराष्ट्र दी लातूर संसदीय सीट सोयां लगातार 7 बारी सांसद रए। उनें आक्खेआ जे पाटिल होरें केंद्र सरकार च गृह मंत्रालय सनें बक्ख बक्ख मंत्रालयें दा कम्म काज संभालेआ। उने नेकां संसदीय समितियें दे सभापति ते सदस्य दे तौर पर बी कम्म कीता। उने पंजाब ते राजस्थान राज्यें दे राज्यपाल ते चंडीगढ़ दे प्रशासक दे तौर पर बी अपनियां सेवा दितियां। पाटिल जी दो कार्यकाल आस्तै महाराष्ट्र विधानसभा दे सदस्य रहे। ओहू महाराष्ट्र विधानसभा दे अध्यक्ष ते उपाध्यक्ष बी रए। उने महाराष्ट्र राज्य दे मंत्री परिषद दे तौर पर बी अपनियां सेवा दितियां। बिरला होरें दस्सेआ जे शिवराज पाटिल हुन्दे कार्यकाल च उत्कृष्ट सांसद पुरस्काधर शुरू कीता गया हा। लोकसभा ते राज्य सभा नै 13 दिसंबर, 2001 च संसद हमले दे शहीदें गी

बी श्रद्धांजलि दिती। उन्दे सम्माकन च दो मिनटे दा मौन रखेआ गया। लोकसभा अध्यक्ष ओम बिरला होरें आक्खेआ जे 2001 च सतर्क सुरक्षाकर्मियें अपना अदम्यर साहस दस्सदे होई आतंकवादियें दी नापाक कोशिश गी नाकाम कीता। राज्यसभा च सभापति सीपी राधाकृष्णन होरें आक्खेआ जे 13 दिसंबर, 2001 इतिहास च काले दिन दे तौर पर दर्ज ऐ जिसलै भारतीय लोकतंत्र दे प्रतीक गी आतंकवादियें निशाना बनाईऐ देशै दी नीहू गी हिलाने दी कोशिश कीती ही।

<><><><><><>

AP Bus Accident

आंध्र प्रदेश दे अल्लूरी सीतारामाराजू जिले च अज्ज बडलै होऐ दे बस हादसे च मरने आहले दी गिनतरी नौ होई गई ऐ। साहडे संवाददाता नै दस्सेआ ऐ जे इस हादसे च करीब 22 लोक घायल होऐ न। हादसे दे मौके बस च दो चालक ते 35 यात्री हे। एहू घटना उसलै होईजिसलै बस गोआंडी राज्य तेलंगाना आहली पेठा जा र दी ही। मुक्मी लोकें ते पुलिस नै घायलें गी चिंतुरु दे अस्पताल च भर्ती कराया गया। गंभीर तौर पर घायल 5 यात्रियें गी भद्राचलम सरकारी अस्पताल च भर्ती कराया गया ऐ। पुलिस अधिकारी नै दस्सेआ जे एहू हादसा बडलै करीब साढे चार बजे होआ। मुख्मन्त्री चंद्रबाबू नायडू होरें घटना पर दुख जताया। उने मारे गेदे लोकें आस्तै अपनियां संवेदना जाहिर कीतियां ते अधिकारियें सोयां चला र दे बचाव कम्में ते पीड़ितें दी मदद दे बारे च गल्ल कीती। राज्यपाल एस. अब्दुल नज़ीर होरें बी बस हादसे पर दुख ते बसोस जाहिर कीता। राष्ट्रपति द्रौपदी मुर्मु, उपराष्ट्रपति सी.पी. राधाकृष्णन ते प्रधानमंत्री नरेन्द्र मोदी होरें हादसे पर दुख जाहिर कीता जे मारे गेदे लोकें दे परोआरें कन्ने अपनियां संवेदना जाहिर कीतियां। सब्बनें घायलें दे तौले नरोए होनें दी कामना कीती। प्रधानमंत्री मोदी होरें घोषणा कीती जे प्रधानमंत्री राष्ट्रीय राहत कोष सोयां मारे गेदे हर व्यक्ति दे नेडमें रिश्तेदार गी दो-दो लक्ख रुपे दी सीधी साहता देने दी घोषणा कीती ऐ। घायलें गी 50-50 हजार रुपे दिते जाडन।

<><><><><><>

Civil-Aviation

नागर विमानन मंत्री राम मोहन नायडू होरें स्यालै आहले मौसम च कोहरे दौरान उड़ान दी तैयारियें दा आकलन करने आस्तै इक व्यापक समीक्षा बैठक दी अध्यक्षता कीती। सोशल मीडिया पोस्ट च उने आक्खेआ जे नागर विमानन महानिदेशालय, भारतीय विमानपत्तन प्राधिकरण, हवाई अड्डा संचालकें, एयरलाइनें ते केंद्रीय औद्योगिक सुरक्षा बल सनें सारे सरबन्धी धडें गी पूरी चाल्ली दिशा निर्देशें दा पालन यकीनी करने, जवाबदेही तय करने ते कोहरे दौरान संचालन आस्तै सख्त मानक संचालन प्रक्रियाएं गी लागू करने दे निर्देश दिते

गए न। उने सुचारू संचालन बनाई रखने आस्तै असल समें च डेटा आदान-प्रदान, वॉर रूम सक्रियण ते योग्य चालक दल कन्नै मानकें मूजब विमानें दी तैनाती पर जोर दिता। उने आक्खेआ जे सुरक्षित, निर्बाध ते सुव्यवस्थित संचालन यकीनी करने दे कन्नो कन्नी यात्रियें गी समें पर अपडेट देने आस्तै साफ निर्देश जारी कीते गए न। तां जे ओहू पैहले सोयां खरी चाल्ली तैयारी करी सकन। उने इस गल्ला पर बी जोर दिता जे हर यात्री महत्वपूर्ण ऐ ते असुविधा दे कुसै बी मामले दा स्पष्ट जवाबदेई कन्नै हल कीता जाग।

<><><><><><>